

DOMENIE ULIVE

Jutoris pe Liturgjie

Domenie, ai 14 di Avrîl dal 2019

Tal cicli dal an, ogni an domenie ulive e torne e e mene, e varès di menâ tai nestrîs paîs une svintade di aiarin, di colôrs e di odôrs, di rinassite e di primevere.

Domenie ulive simpri compagne, ma ancje tant diferente ancje parcè che tal zîr di dodis mès o podìn cjatâsi cambiâts dentri di nô e torator di nô. Al è normâl vuê scuvierzisi posizionâts in situazions gnovis, ma soredu in dubis e domandis, in riflessions e sieltis che no si jerin fats in dute la vite. I “buchî neri” che si cjacare in chestis zornadis dopo la ricostruzion fotografiche de buse nere distante de tiere 55 milions di agns-lûs a son alc di maraveôs ma nus stichin e no stichin; nus fasin spavent invezit lis masse busatis neris che a supin e a glotin la nestre umanitât e a fasin domandâ par cheste societât, pe glesie e par nô un pont di riferiment, une civiltât gnove, un Om vêr, un Messie...

Come cristians si cjatìn vuê pe benedizion dal ulîf e duncje il nestri Messie al reste Jesù di Nazaret. A lui ancje chest an i berlin: Osana tal plui alt dai cîi. Benedet tu che tu sês vignût te bondance de tô misericordie.

Jentrìn duncje a Jerusalem ancje nô: tornin a fâ fieste al Signor, scoltìn chel Jesù che nus dîs propit vuê: “Lait a prontânus la Pasche”. E nô i domandìn cui apuestui e cu la nestre int: “Signôr, dulà vuelistu che le prontin?”; e parecjade la Pasche seont il so consei e l’afiet dal nestri cûr, lui nus disarà: “O ài tant bramât di mangjâ cheste Pasche cun vualtris, prin di patî (Lc 22, 8-9.14).

Fat chest, metûts dacuardi cun lui sul cemût celebrâ lis zornadis de sô passion, sepulture e Risurrezion o podìn cumò jentrâ te liturgjie de messe di domenie ulive.

Antifone di jentrade

cf. Zn 12,1.12-13; Sal 23,9-10

Sîs dîs prime de grande Pasche, cuant che il Signôr al jentrà te citât di Gjerusalem, i fruts i lerin incuintri:

tes mans a puartavin ramaçs di palme e a berlavin a grande vôs disint:

Osana tal plui alt dai cîi. Benedet tu che tu sês vignût te bondance de tô misericordie.

Alçait, puartis, lis vuestris antis,

alçaitsi, puartis eternis,

par ch’al jentri il re de glorie.

Po cui esal il re de glorie?

Il Signôr des schiriis, al è lui il re de glorie.

Osana tal plui alt dai cîi.

Benedet tu che tu sês vignût te bondance de tô misericordie.

Colete

Diu onipotent e eterni,

che par dâi un esempi di umiltât a la gjernazie umane

tu âs fat cjapâ sù al nestri Salvadôr la nestre cjar

e patî la muart in crôs,

danus la gracie di vê denant dai vôi il spieli dai siei patiments

e di mertâ di spartî la sô resurrezion.

Lui ch’al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE

Is 50,4-7

No ai platade la mê muse ai patafs e a lis spudadis, savint che no sarai malapaiât.
Tierç cjant dal Servidôr dal Signôr

I prins critians a àn viodût in chest tierç cjant dal servidôr di Jahvè il spieli di Jesù te sô passion. Forzit a àn ancje adate la vicende di Jesu a chest cjant intant che lu ponevin te curnis dal Calvari.

*Culì o sin te puarte di ingrès al vanzeli dal Passio. De sô passion Jesù nus dîs:
“Chel servidôr che cumò o scoltais, o soi jo”.*

Dal libri dal profete Isaie

Il Signôr Diu mi à dade une lenghe di dissepul,
par ch’o sepi tignî sù chel ch’al è strac
cu la peraule.

Lui al vierç la mê orele
par ch’o scolti, come ch’a fasin i dissepui.

Il Signôr Diu mi à vierzude la orele
e jo no soi stât cjaviestri,
no mi soi tirât indaûr.

O ai presentade la mê schene a di chei che mi pestavin,
la mê muse a di chei che mi gjavavin la barbe.

No ai platade la mê muse
ai patafs e a lis spudadis.

Il Signôr Diu mi à dât jutori,
par chel no soi malapaiât;
par chel o ai fate diventâ la mê muse tant che une pierre
e o sai che no sarai malapaiât.
Peraule di Diu.

SALM RESPONSORIÂL

dal Salm 21

Nol pues mancjâ te liturgjie de messe di domenie ulive chel berli: Diu gno, Diu gno, parcè mo mi âstu bandonât?

*Culì al è dome il struc di un salm che al è profezie - presentazion - lamentazion di Crist:
salm di Vinars sant. Tant te prime leture Crist al jere sigûr di sé e tant culi une angosse mortâl lu sta cjapant.*

Plui di une volte, soledut in aviliments trements che a puedin rivâ, al è ancje il nestri salm: di preâ cun Crist cuant che insiemî cun lui o sin peâts mans e pîts a une crôs che no nus mole.

R. Diu gno, Diu gno, parcè mo mi âstu bandonât?

Se cjantât: Il cjant dai salms responsoriâi, p. 201.

A tachin a sghignî ducj chei che mi viodin,
a menin il cjâf e a stuarzin la bocje:
«Si è metût tes mans dal Signôr, che lu liberi;
se propit i vûl ben che lu salvi lui». **R.**

Un trop di cjanats mi dan la strente,
un trop di intate mi contorne.
A an sgjavât lis mêns mans e i miei pîts,
ducj i miei vues o pues contâju. **R.**

Si spartissin fra di lôr la mê munture,

i miei vistîts sai tirin a bruscjete.
Ma tu, Signôr, no sta lâmi di bande,
tu, la mê fuarce, spessee a judâmi. **R.**

O contarai il to non framieç dai fradis,
ti laudarai in plene semblee.
Vualtris, ch'o temês il Signôr, laudaitlu,
gjernazie di Jacop, dait glorie a lui,
ducj vualtris, dissendence di Israel, onoraitlu. **R.**

SECONDE LETURE

Fil 2,6-11

Crist si è sbassât e ridusût a nuie, par chel Diu lu à puartât in alt.

Une grande riflessione des primis comunitâts cristianis sul misteri di un Diu ridusût a nuie, ma ancje puartât in alt tun non ch'al è plui alt di ogni altri non.

Culî, muart e resurezion dal Signôr a cancelin ogni nestri resonament e a superin in profunditât ogni nestre fantasie.

Devant di une tâl rivelazion, nus ven pandût ancje l'atgjament che o varessin di sintî e di tignî: si plei ogni zenoli / des creaturis dai cîi, de tiere e di sot tiere / e ogni lenghe e professi / che Gjesù Crist al è il Signôr.

De letare di san Pauli apuestul ai Filipês

Crist Gjesù, jessint Diu par nature,
nol à ritignût un ben di no molâlu
il so jessi compagn di Diu,
ma si è ridusût a nuie
cjapant sù la nature di sotan
e diventant compagn dai oms;
comparît in forme di om,
si è sbassât in mò di plui
fasintsi ubidient fint a la muart
e a la muart di crôs.
Par chel Diu lu à puartât in alt
e i à dât chel non
ch'al è plui alt di ogni altri non,
par che tal non di Gjesù
si plei ogni zenoli
des creaturis dai cîi, de tiere e di sot tiere
e ogni lenghe e professi
che Gjesù Crist al è il Signôr,
a glorie di Diu Pari.
Peraule di Diu.

CJANT AL VANZELI

Fil 2,8-9

R. Glorie e laut a ti, o Crist!

Par nô Crist si è fat ubidient fint a la muart,
e a la muart di crôs.

Par chel Diu lu à puartât in alt
e i à dât chel non ch'al è plui alt di ogni altri non.

R. Glorie e laut a ti, o Crist!

VANZELI

Lc 22,14-23,56

La passion dal Signôr.

Svicinînsi, anîn daûr a Crist te sô passion, ma dome se prime o vin in cûr cualchi persone che e sta lacrimant di dolôr su pe rive dal Calvari.

Scoltîn il “Passio” ma dome se prime o vin scoltade lis passion di cualchi tribulât de sô vive vôs.

La passion di Crist si pues scoltâle in maniere rituâl in glesie di domenie ulive, ma si devi incuintrâle in maniere concrete-reâl tes cjasis dal paîs.

Cence smenteâ lis situazions di disagjo dal nestri popul e il berli cence rispueste des nestris comunitâts cristianis destinadis a une lente agonie.

Di chest Passio, nol covente lei dut, nol covente savê dut. Ognun che al invochi il Spirtu Sant par podê cjatâ culî la midisine che i covente.

Passion di nestri Signôr Gjesù Crist seont Luche

Cuant che e rivà l'ore, Gjesù si sentà in taule e cun lui ancje i ap lis situazions di disagjo des nestuestui. E ur disè: «O ai tant bramât di mangjâ cheste Pasche cun vualtris, prin di patî, parcè che us dîs che no le mangjarai plui fin che no sarà colmade tal ream di Diu». E cjapât in man un cjaliç, al ringrazià e al disè: «Cjapaitlu e fasêtsal passâ fra di vualtris, parcè che us dîs che di cumò indenant no bevarai plui dal struc de vîtfîn che nol vignarà il ream di Diu».

Po al cjapà sù un pan, al ringrazià, lu crevâ e ur al de disint: «Chest al è il gno cuarp, ch'al ven dât vie par vualtris. Fasêt cussì in memorie di me». Te stesse maniere, dopo finît di cenâ, al cjapà il cjaliç disint: «Chest cjaliç al è la gnove aleance tal gno sanc, spandût par vualtris».

«Ma ve, la man di chel che mi tradis e je cun me, su la taule. Parcè che il Fi dal om si'nt va come ch'al è stât distinât; ma puar mai chel om che lu tradis». Alore lôr a scomençarin a domandâsi cui di lôr ch'al varès fate une robe dal gjenar.

E fra di lôr si inviâ une cuistion: cui di lôr ch'al veve di jessi ritignût il plui grant. Lui ur disè: «I rês a comandin sui lôr popui e chei ch'a an il podê su di lôr si fasin clamâ benefatôrs. Vualtris però no vês di fâ cussì; ma chel di vualtris ch'al è il plui grant al à di diventâ come il plui piçul e chel ch'al comande al à di diventâ come chel ch'al servîs. Di fat cui esal plui grant: chel ch'al è sentât in taule o chel ch'al è a servî? No esal chel ch'al è sentât in taule? Poben, jo o soi framieç di vualtris come un ch'al servîs.

Vualtris o sês chei ch'a son restâts cun me tes mêis provis. Cumò jo o prepari par vualtris un ream come che il Pari mal à preparât a mi, par ch'o podês mangjâ e bevi su la mê taule tal gno ream. E si sentarês su lis sentis par judicâ lis dodis tribûs di Israel. Simon, Simon, scolte! Satane al à vût il permès di tamesâus come il forment. Ma jo o ai preât par te, par che la tô fede no si distudi. E tu, cuant che tu sarâs tornât in te, rinfuarce i tiei fradis». Alore Pieri i disè: «Signôr, cun te o soi pront a lâ in preson e ancje a murî». Gjesù i rispuindè: «Pieri, tal dîs: vuê il gjal nol cjantarà prin che tu, par trê voltis, tu vedis professât di no cognossimi».

Po ur disè: «Cuant che us ai mandâts cence sporte e cence sac e cence sandui, us aial mancjât alc?».

I rispuinderin: «Nuie». Alore ur disè: «Cumò però chel ch'al à une sporte, che le cjapi sù e cussì ancje il sac; e chel che nol à la spade, ch'al vendi la manteline e int compri une. Di fat us dîs che al à di colmâsi in me ce ch'al è scrit: “Lu à metût tal numar dai delincuentis”. Di fat dut ce che mi rivuarde me al sta par colmâsi». Alore lôr i diserin: «Signôr, ve chi dôs spadis». Ma lui ur rispuindè: «Vonde!».

Saltât fûr, al lè, cul so solit, su la mont Ulive; ancje j dissepui i lerin daûr. Cuant che al rivà sul puest, ur disè: «Preait, par no colâ te tentazion». Po si slontanà di lôr cualchi pas e, inzenoglàt, al preave: «Pari, se tu vuelis, slontane di me chest cjaliç. Però che no sedi fate la mê, ma la tô volontât». Alore i compari un agnul dal cîl par confuartâlu. E, jentrât in angunie, al preave cun plui insistence. E il so sudôr al diventâ come gotis di sanc ch'a gotavin par tiere. Po al jevà sù de preiere al lè dai dissepui e ju cjatâ indurmidîts, par colpe dal aviliment. E ur disè: «Parcè mo durmîso? Jevait sù e preait par no ch'o colais te tentazion».

Intant ch'al jere ancjemò daûr a fevelâ, ve ch'e rivà une fulugne di int; in teste al jere chel che si clamave Gjude, un dai Dodis. Si svicinà a Gjesù par bussâlu. Gjesù i disè: «Gjude, tradissistu il Fi dal om cuntune bussade?». Chei ch'a jerin cun lui, a pene che si inacuarzerin di ce ch'al stave par sucedi, i diserin: «Signôr, vino di doprà la spade?». E un di lôr i petà al famei dal sorestant dai predis e i cjonçà l'orele gjestre. Ma Gjesù al intervignì disint: «Lassait stâ, vonde cussi!». E tocjant l'orele, lu vuari. Po Gjesù ur disè ai sorestants dai predis, ai graduâts dal templi e ai anzians ch'a jerin vignûts cuintri di lui: «O sês vignûts cun spadis e cun bastons come cuintri di un delinquent. E sì ch'o jeri cun vualtris ogni dì tal templi e no mi vês mai brincât. Ma cheste e je la vuestre ore e il podê dal scûr».

Dopo di vêlu cjavât, lu menarin vie e lu puartarin in cjase dal sorestant dai predis. Pieri intant i leve daûr di lontan. Tal mieç dal curtil al jere impiât un fûc e tancj di lôr si jerin sentâts torator. Ancje Pieri si sentà framieç di lôr. Une sierge lu viodè sentât dongje dal fûc e cjalantlu ben in muse e disè: «Ancje chest om culi al jere cun lui». Ma lui al dineà disint: «Femine, no lu cognòs!». Subit dopo un altri, viodintlu, i disè: «Ancje tu tu sês un dai lôr». Ma Pieri i rispuindè: «No, no soi gran!».

Dibot un'ore dopo, un altri al tacà a contindi disint: «E je vere: ancje chel chi al jere cun lui; di fat al è un galileo». Ma Pieri i disè: «Om, no sai ce che tu stâs disint». E juste in chel, cuant che Pieri al jere ancjemò daûr a fevelâ, al cchantà un gjal. Alore il Signôr, voltantsi, al cjalà Pieri, e Pieri si impensà de peraule dal Signôr, che i veve dit: «Vuê, prin che il gjal al cjanti, tu tu mi rinearàs par trê voltis». E jessût fûr, al vai cul cûr plen di marum.

Intant i oms ch'a vuardeavin Gjesù lu cjolevin vie e lu pacavin. I taponavin i vôi e i domandavin: «Induvine: cui ti aial petât?». E a disevin cuintri di lui tantis altris robis, blestemaçant.

A pene ch'al cricà di, si derin dongje i sorestants dal popul insieme cui sorestants dai predis e cui scrituriscj. Lu menarin denant dal sinedri e i diserin: «Se tu sês il Crist, dîsinusal ancje a nô!».

Gjesù ur rispuindè: «Ancje se us al dîs, vualtris no mi crodarês. Se invezit us interpeli, vualtris no mi rispuindarês. Ma di cumò indenant il Fi dal om si sentarà a gjestre de potence di Diu». Alore ducj i domandarin: «Sicheduncje tu sês il Fi di Diu?». E lui ur rispuindè: «Ancje vualtris o disês che jo lu soi». A rispuinderin: «Ce bisugne vino di altris testimonis? Lu vin sintût propit nô, de sô boeje!».

Dute chê semblee si cjapà sù e lu menarin denant di Pilât. Li a tacarin a incolpâlu: «Chest om lu vin cjavât ch'al soflave la nestre int, ur improibive di paiâi i tribûts a Cesar e al diseve di jessi lui il Crist re». Alore Pilât i domandà: «Sêstu tu il re dai gjudeos?». E lui i rispuindè: «Tu lu disis tu». Pilât ur disè ai sorestants dai predis e a la fole: «In chest om no cjati nissun motif par condanâlu». Ma lôr a tignivin dûr: «Chel li al sabore il popul, insegnant par dute la Gjudee, dopo di vê tacât de Galilee fin culi».

A pene che Pilât al sintì une tâl, ur domandà se chel om al jere galileo e, savût ch'al jere sot di Erode, lu mandà di Erode, ch'al jere a Gjerusalem juste in chei dîs.

Cuant che al viodè Gjesù, Erode s'indalegrà une vore. Di fat al jere un biel pieç ch'al bramave di viodilu parvie ch'al veve sintût a fevelâ sul so cont e al sperave di viodilu a fâ cualchi miracul. Lu interpelà a lunc, ma Gjesù no i rispuindè nancje une peraule. Intant i sorestants dai predis e i scrituriscj, ch'a jerin li, a batevin saldo tal incolpâlu. Ancje Erode, insieme cui siei soldâts, lu svilanà; par sblefâlu i metè intor une vieste blancje e lu tornà a mandâ di Pilât. Erode e Pilât, che prime a jerin in rotis, d'in chê di a tornarin in buinis. Pilât, clamâts dongje i sorestants dai predis, lis autoritâts e il popul, ur disè: «Mi vês puartât chest om come ch'al soflàs il popul. Poben, jo lu ai scrutinât denant di vualtris ma no ai cjavât in lui nissun dai delits che lu incolpais; e nancje Erode, parcè che nus al à tornât a mandâ indaûr. Duncje lui nol à fat nuie par mertâsi la muart. Alore, dopo di vêlu fât scoreâ, lu lassarai libar». Pe fieste de Pasche lui al scugnive meti in libertât cualchidun. Ducj insieme a tacarin a berlâ: «A muart chel culi! O volin libar Barabe!». Chel al jere stât metût dentri parcè che al veve inviate une rivolte in citât e al veve copât. Pilât ur tornà indaûr a fevelâ, cul fin di liberâ Gjesù. Ma lôr a berghelavin:

«Metilu in crôs! Metilu in crôs!». Lui, pe tierce volte, ur disè: «Ma ce aial fat di mâl chest om? No ai cjavât in lui nissun delit par ch'al merti copât. Pa la cuâl lu fassarai scoreâ e po lu lassarai libar».

Ma lôr a batevin ancjemò di plui, domandant ch'al fos metût in crôs. E i lôr berlis a jerin simpri plui fuarts. Alore Pilât al de ordin di fâ ce ch'a domandavin lôr. Al molà chel ch'al jere stât metût in preson par rivolte e omicidi, e che lôr a domandavin, ma ur bandonà Gjesù al lôr volê.

Intant che lu menavin vie, a fermarin un cert Simon di Cirene, ch'al tornave dai cjamps, e i meterin intor la crôs di puartâle daûr di Gjesù.

I leve daûr une vore di int dal popul e di feminis che si batevin il pet e a vaivin par lui. Gjesù si voltà de lôr bande e ur disè: «Fiis di Gjerusalem, no stait a vaî par me; vaît invezit par vualtris e pai vuestris fis. Ve, a vignaran zornadis che si disarà: Furtunadis lis sterpis e chês che no an mai vût fruts e i pets che no an mai dât di tete. Alore la int e tacarà a dîur a lis monts: Colait sore di nô! E a lis culinis: Taponaitnus! Parcè che se si trate cussi il len vert, ce no saraial dal len sec?».

Insieme cun lui a vignivin menâts a murî ancje doi delincueents. Cuant che a rivarin sul puest, che i disin lûc de Crepe, a meterin in crôs lui e i doi delincueents, un a gjestre e chel altri a çampe. Gjesù al diseve: «Pari, perdoniur, parcè che no san ce ch'a fasin».

Intant, dopo di vêsi spartidis lis sôs viestis, lis tirarin a bruscjete.

Il popul al stave a cjalâ. I socestants dal popul invezit lu svilanavin disint: «Al à salvât chei altris, che si salvi sè s'al è il Crist di Diu, l'elet». Ancje i soldâts lu svilanavin; i levin dongje par dâi asêt e i disevin: «Se tu sês il re dai gjudeos, salviti!». Parsore dal so cjâf e jere ancje une scrite: Chel chi al è il re dai gjudeos. Un dai delincueents ch'a jerin stâts metûts in crôs lu ofindeve: «No sêstu tu il Crist? Salviti te e ancjenô!». Ma chel altri lu corezeve: «No âstu propit nissun timôr di Diu, tu che tu stâs paiant la stesse condane? Par nô e je juste, parcè che o cjapin la pene mertade cu lis nestriz azions, ma lui invezit nol à fat nuie di mâl». Po al zontà: «Gjesù, impensiti di me cuant che tu vignarâs tal to ream». Gjesù i rispuindè: «Tal dîs in veretât: vuê tu sarâs cun me in paradîs».

Si jere za tor misdi cuant che si fasè scûr sun dute la tiere, fintremai a lis trê, parvie che il soreli al jere sparît. Il vêl dal templi si sbregà pal mieç. E Gjesù, berlant a dute vôs, al disè: «Pari, tes tôs mans o racomandi il gno spirt». E dopo dit cussi, al spirà.

Chi si inzenoglisi e si fâs une piçule polse.

Il centurion, viodint ce ch'al jere sucedût, al glorificave Diu: «Chest om al jere propit just». Ancje ducj chei che si jerin dâts dongje par cjalâ, denant di chescj fats a tornarin cjase batintsi il pet. Ducj i siei amîs e lis feminis che i vevin stât daûr ancjemò de Galilee, a stavin lontans, cjalant dut ce ch'al succedeva.

Al jere un om di non Josef, un dal sinedri, om just e bon, che no ur veve tignût man in ce ch'a vevin decidût e fat. Al jere natîf di Arimatee, une citât dai gjudeos, e al spietave il ream di Diu. Si presentà di Pilât e i domandà il cuarp di Gjesù. Lu tirà jù de crôs, lu invuluçà tun linzûl e lu metè tun sepulcri, picât tal cret, là che nol jere stât metût nancjemò nissun. E jere la vilie di Pasche e za e tacave a cricâ la sabide. Lis feminis ch'a jerin vignudis cun Gjesù de Galilee, a compagnarin Josef e a vioderin il sepulcri e cemût ch'al jere stât metût jù il cuarp di Gjesù. Po a tornarin a cjase, par preparâ profums e onzints. Te zornade di sabide a polsarin, come ch'e ordene la leç.

Peraule dal Signôr.

Si dîs O crôt.

Su lis ufiertis

Pe Passion dal to Unigjenit,
spessee, Signôr, a fâ pàs cun nô
e se no le mertin pes nestriz oparis,
che nus e fasi vê la tô misericordie
in gracie di cheste ufierte straordenarie.
Par Crist nestri Signôr.

Antifone a la comunion

Pari gno,
se chest cjaliç nol pues slontanâsi
cence che lu bevi,

Mt 26,42

ch'e sedi fate la tô volontât.

Daspò de comunion

Sostentâts di chest sant regâl, ti prein, Signôr,
che, daspò di vênus fats sperâ cu la muart di to Fi in ce ch'o crodin,
cu la sô resurezion tu nus fasis rivâ là ch'o bramin.

Par Crist nestri Signôr.

Preiere sul popul

Cjale cheste tô famee, Signôr,
che il nestri Signôr Gjesù Crist nol à esitât par jê
a consegnâsi tes mans dai triscj
e a frontâ la torture de crôs.
Lui ch'al vîf e al regne tai secui dai secui.

* * *

Riflession di pre Antoni Beline: **Se a tasin lôr a berlaran i claps**

La fieste di vuê (e dut l'intono al è di fieste, ancje se o jentrin te setemane sante e dolorose che a viodarà l'agonie e la muart dal Fi di Diu e Fi dal om) e je come une grande jentrade tal senari cosmic de passon, de muart e de resurezion di Crist, dal plui grant misteri dal mont, dal plui grant e impuartant fat de storie...

Vanseli par un popul, an C, p.63.

* * *

Ciants di Domenie olive

- Osana, osana, *n. 143;*
- Sîs dîs prin di Pasche, *n. 144;*
- I fruts dai Ebreus, *n. 145;*
- Laut, onôr e glorie, *n. 146;*
- Christus vincit, *n. 147.*

Salm 21: Diu gno, Diu gno, parcè mo mi âstu bandonât, *n. 240.*

Cjants dal timp di Coresime

- Parce Domine, *n. 125;*
- Signore guardaci nel tuo amore, *n. 126;*
- O muse insanganade, *n. 128;*
- O capo insanguinato, *n. 129;*
- O Signôr a schene plete, *n. 130;*
- Viers la cjase amade, o Pari, *n. 131;*
- Crist, Fi di Diu, ve dûl di nô, *n. 132;*
- Gno Diu, mê ruvîs là che mi pari, *n. 133;*
- Se il timp che Diu ti preste, *n. 134;*
- Come a l'aghe de fontane, *n. 135;*
- Quanta sete nel mio cuore, *n. 136;*
- Alla tua mensa, amato Salvatore, *n. 137.*

Salm dal Miserere, n. 50.

- Misere mei Deus, n. 231;
- Ve dûl di me, n. 252; n. 253.

Strade de crôs, n. 138;

Via crucis, p. 285.

Tal libri Hosanna, si puedin cjatâ ancjemò altris cjants e salms adats al timp di Coresime.

* * *

*A ti bielzà pront a patî
a presentin la lôr riverence;
cumò che vîf tu regnis
o sin nô che ti fasìn fieste.*

*Se lôr ti àn plasût in chê dî,
vuê ti plasi la nestre profierte,
Re cjâr e tant amabil
che tu amis lis robis sinceris*

De: Cjante di Domenie ulive - n. 146.

* * *

Che nus compagni in cheste setemane sante la benedizion de Passion dal Signôr:

Diu, Pari di ogni misericordie, che te passion dal so Unigjenit
us à lassât un speli di amôr,
che us dedi la gracie di servî Diu e i oms
par gjoldi dal don inefabil de sô benedizion.
Amen.

Midiant de fede inte sô muart tal timp,
che us vuardi de muart perpetue
e us dedi il premi de vite eterne.
Amen.

Daspò di vê compagnât Crist intes provis e inte umiltât,
ch'ò podedis vê part a la sô resurezion.
Amen.

E la benedizion di Diu onipotent,
Pari, e Fi, + e Spirtu Sant,
ch'è vegni jù sore di vualtris, e ch'è resti par simpri.
Amen.

Dal Messâl

* * *

***Une buine, serene, cristiane setemane sante
e une buine serene solenitât di Pasche***

*tal vuestri cûr e famee,
tra i vuestris puars e tribulâts,
tes comunitâts e tai paîs.*

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*
- * *Par domandâ chescj libris scrivêt a info@glesiefurlane.org*